

天女爾時說偈答言

昔於迦葉佛 受持八戒齋 今得生天中 獲是端政報
釋提桓因重以偈讚

奇哉功德田 能生勝妙報 昔少修微因 而得生天上
如此勝福聚 誰當不供養 如是最勝尊 誰當不恭敬
諸有聞是者 宜應大歡喜 欲求生天者 應當持淨戒

爾時此天持好華蓋來至佛所。佛為說法。得見諦道。時諸比丘。即問佛言。此天往昔。作何福業。得生天中。而獲聖果。佛言。昔為人時。於迦葉佛所。受持八齋。由是善行。生於天上。而見道跡。

五四、天女本以然燈供養生天緣

爾時王舍城。頻婆娑羅王。於佛法中得道。獲不壞信。常以燈明。供養於佛。後提婆達

多。與阿闍世王。作惡知識。欲害佛法。是以國土。怖畏不復。然燈供養。有一女人。以習常故。於僧自恣日。佛經行道頭。然燈供養。阿闍世王。聞極大瞋恚。即以劍輪。斬腰而殺。命終得生三十三天摩尼焰宮殿中。乘此宮殿。至善法堂。帝釋以偈問曰

汝昔作何業 身如聚真金 而有大威德 容貌甚光明

天女即時以偈答言

三界之真濟 三有之大燈 至心眼觀佛 相好莊嚴身

法中之最勝 為之然明燈 燈然以滅闇 佛燈滅眾惡

見燈如日光 真實生信心 睹燈明熾盛 歡喜而禮佛

說此偈已。來至佛所。佛為說法。得須陀洹。即還天上。比丘問佛。以何因緣。生於天宮。佛言。昔在人間。於僧自恣日。佛經行道頭。然燈供養。阿闍世王。斬其腰殺。以是善因。命終之後。得生天中。重於我邊。聞法信解。得須陀洹道。